

Malaysia, Brunei laksana VTL

Dua negara iktiraf MySejahtera, BruHealth bagi lancar pergerakan rentas sempadan

Bandar Seri Begawan: Datuk Seri Ismail Sabri Yaakob berkata, Malaysia dan Brunei bersetuju melaksanakan Laluan Perjalanan Lengkap Vaksin (VTL) Malaysia-Brunei bagi sektor udara dan darat.

Perdana Menteri berkata kedua-dua negara bersetuju pelaksanaan empat penerbangan seminggu antara Kuala Lumpur dan Bandar Seri Begawan.

Bagi tujuan itu, katanya, kementerian berkaitan akan meneliti prosedur operasi standard (SOP) bagi pelaksanaan inisiatif VTL.

"VTL pergerakan rentas sempadan darat juga dalam pertimbangan kedua-dua pihak," katanya.

Katanya, Sultan Brunei, Sultan Hassanal Bolkiah, turut menyatakan persetujuan bagi kedua-dua negara mengiktiraf MySejahtera dan BruHealth bagi melancarkan pergerakan rentas sempadan rakyat kedua-dua negara.

"Saya dan baginda Sultan Hassanal Bolkiah menyentuh mengenai usaha dan inisiatif bagi meningkatkan hubungan istimewa ke tahap yang lebih tinggi dan komprehensif, kerjasama ekonomi, perdagangan dan pelaburan.

"Saya juga telah menjemput kerajaan Brunei bersama-sama terbahit dalam penyelidikan dan pembangunan (R&D) vaksin COVID-19. Buat permulaan, Institut



Sultan Hassanal Bolkiah berkenan bertitah pada Majlis Santapan Rasmi sempena lawatan Ismail Sabri di Istana Nurul Iman, Bandar Seri Begawan, semalam. Turut berangkat, Raja Isteri Pengiran Anak Hajah Saleha dan Muhaini. (Foto BERNAMA)

Penyelidikan Klinikal (ICR) bersedia bekerjasama dengan pakar dari Universiti Brunei Darussalam dalam penyelidikan 'Antibody Response to COVID-19 Vaccines'," katanya dalam sidang media sempena lawatan itu.

Beliau juga berkata kedua-dua negara bersetuju meneruskan rundingan untuk memuktamadkan cadangan projek Lebuhraya Trans-Borneo.

Terdahulu, Ismail Sabri mengadakan pertemuan empat mata dengan dan Sultan Hassanal di Istana Nurul Iman, di sini.

Sultan Hassanal ketika bertitah pada majlis itu berkata, Brunei menyambut baik rundingan cadangan pelaksanaan VTL bagi melancarkan semula pergerakan rentas sempadan antara Brunei dan Malaysia.

Baginda percaya langkah itu akan menyumbang ke arah pe-

mulihan ekonomi kedua-dua negara dan berharap kerjasama itu akan dapat diperluaskan khususnya dengan Sabah dan Sarawak dalam meningkatkan kesalinghubungan perdagangan.

"Ini akan memberi keyakinan dengan pihak swasta untuk terus bergerak maju ke hadapan dan dalam fasa pemulihan COVID-19," titah baginda.

Baginda bertitah dengan situasi wabak COVID-19 yang masih melanda dunia, Brunei dan Malaysia terus berganding bahu dalam memastikan kesejahteraan dan keselamatan rakyat terus terjamin.

"Hubungan akrab yang sekian lama terjalin antara kerabat diraja mahupun kerajaan serta rakyat kedua negara kita adalah keunikan yang unggul dari keistimewaan yang berpaksikan kesamaan agama, rumpun seja-

rah dan bahasa.

"Oleh itu adalah penting untuk terus menyemai hubungan yang saat bermakna ini demi memupuk persefahaman dan silaturahim antara kita," titah baginda.

Turut berangkat, Raja Isteri Pengiran Anak Hajah Saleha.

Sementara itu, Ismail Sabri dalam ucapan balas berkata hubungan yang begitu erat antara Malaysia dan Brunei telah membuka peluang kerjasama kepada kedua-dua negara dalam pelbagai bidang yang bermanfaat bersama meliputi perdagangan, kesihatan, pertahanan dan pelancongan.

"Hubungan negara bersaudara ini tidak hanya terhad kepada hubungan di peringkat dua hala namun hubungan akrab rakyat kedua-dua negara turut berada pada tahap yang membanggakan," kata Perdana Menteri.

Terdahulu Perdana Menteri yang ditemani isteri Datin Seri Muhaini Zainal Abidin tiba di Istana Nurul Iman, di sini pada jam 11.10 pagi untuk majlis menghadap Sultan Brunei.

Turut hadir Menteri Luar, Datuk Seri Saifuddin Abdullah; Menteri Wilayah Persekutuan, Datuk Seri Shahidan Kassim dan Pesuruhjaya Tinggi Malaysia ke Brunei Datuk Raja Reza Raja Zain Shah.

Perdana Menteri kemudian mengadakan pertemuan empat mata dan antara perkara yang dibincangkan pada pertemuan itu adalah pelaksanaan VTL antara Brunei dan Malaysia dan pengiktirafan bersama Sijil Vaksinasi COVID-19.

Ini adalah lawatan rasmi pertama Ismail Sabri ke Brunei selepas dilantik sebagai Perdana Menteri Ogos lalu. BERNAMA